



ESTD. MARCH 2008

JULY 2023

# Hinna Vâk

AN ORGAN OF THE TANGPHAI PRESBYTERIAN CHURCH



THINA HUAISIA TAK A PAT THOKIT JESU KHRISTA

- Patepna
- Khanglaite'n Kochuam gamlatte ngaisakna
- Pathian doigual lungngaina

To,

\_\_\_\_\_  
\_\_\_\_\_

*If undelivered please return to* - TPC Office,  
P.O. Box - 107  
D. Phailian,  
Churachandpur - 795128  
Manipur, India

EDITORIAL | SERMON | KOCHUAM HUANG | REPORTS | SÛNNA ETC.

**Editor** : Rev. S. Lama Vaiphei, Executive Secretary

**Joint Editors** : Rev. P.B Zosapthara, Consultant  
: Rev. K. Jama Vaiphei  
: Rev. Th. Samuel Vaiphei  
: Upa Lalminsang  
: Upa S. Lalpi  
: Pi Hawipakkim, Secretary, CKNP  
: Upa Genminlun, Secretary, CKKP

**Business Manager** : Pu Lalbiaklian, Office Superintendent  
TPC Office D. Phailian  
P.O. Box 107 CCPur-795128 Manipur  
Phone No. +91 9089623251  
Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

### A SUNGAH THU UMTE

1. EDITORIAL	01
2. KOCHUAM HUANG	02
3. THINA HUAISIA TAK A PAT THOKIT JESU KHRISTA	04
4. PATEPNA	09
5. KHANGLAITE'N KOCHUAM GAMLATTE NGAISAKNA	12
6. PATHIAN DOIGUAL LUNGNGAINA	22
7. I CHUNG UA LALPA A LUNG DAM DING PAWIMAW A HI	27
8. SUNNA	31

Moderator : Rev. Ngurthanmawia Sailo  
Secretaries : Rev. C. Lalrinliana (Sr.)  
: Rev. Thanglianlal (Jr.)  
Finance Officer : Rev. S. Khaikhawlam  
Statistician : Upa Kaikhokam  
Executive Secretary : Rev. S. Lama Vaiphei  
Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



## Pauchapna Thupi:

1. Phaipi Presbytery sung ah Leilon Bial leh Jiribam Bial te hi a din zing theina ding in pauchap piak hitiu.
2. Gamsung buaina ziak ah panlatu pawl chuam chuam ah puitute a ding in pauchap hitiu.
3. Gamsung buaina hi a phalam ah a hung kiven vak theina ding in dawn hitiu.

## GAM LUA LA UT LEH

Manipur mi ka hi tingal ah a gamlua theilo mai ding dinmun in i um vang vang ziang ua, a mak khawp mai hi. Ezekiel 33:25-26 en tia, Israel ten gam a lua theilo na ziaak uh a gen hi. Gam lua na ding a chun gualzaw a ngai iti mai thei ua, maleh Pathian chate i hi ziaak un i gam uh i lua thei na ding dan uh i ginnau kingakna i Bible in ei gendan hi vak en khawm tiam hi tiu. *“I chung ua Lalpa a lungdam leh zia gam chu ei pe ding a hi”* ti hi Joshua leh Kaleph te mu dan chu a hi. Lalpa i chung ua a lungdam thei na ding a chun ziate hi enkhawm hi tiu:

*Thunuaigawl ten gam hi la lua in au* (Sam 37:11). Michapo te gam lua a phal pua, Mikiletsak hi chu Lalpa'n a hua a hi. Mi kingaitawmte chu Lalpa'n a tungding sek hi. *A malzawlna dawng ten gam hi la lua in au* (Sam 37:22). Sum leh pai nei leh lam khawlkhawm hi malzawlna ahi ziang pua, a hunglutna tuikai leh a pawtdawna tuikai hi Pathianin a enzui gel gel hi. *Lalpa a ginna nga ten gam hi la lua in au* (Is. 57:13). Mihiam thahatna suang tute hilo, galvan hawi hilo, Kangtalai le hilo; Lalpa ah ginna nga tute chun gam lua ding a hui. *Mi nunnem tak te chun gam hi la lua in au* (Matt 5:5). Nunnem angai hun hi nunnem ahaksat hun ahi sek a, i lungnat hun, i thangtawm hun, i chawl hun te a hi sek hi. Nunnemna hi pianpi hiloin kizil thei a hi. *Ginna a felna ziaakin gam hi la lua in au* (Rom 4:13). Kido hunlai ah Pathian leh mihiam mitmu ah felna suklat ngam hi a pawimaw khawp mai hi.

Leigam leh kumtuang gam lua kawp thei ding ah malsawm i hui a, Leigam hile ngainep thei ei puai. Pathianin gam ei pia a suknuam hi gingtute mawpuakna a hi.



**Kochuam Huang**

### **Kochuam Programme-te chiapi zel ding dan**

Vangsiat um tak ah buaina'n ei hung tunkhum tâk ziak in, i Kochuam Programme umsa – Seminar, Kikhawmpi, Training etc. te hi Synod Officers' Meeting (O.M.) in a hun leh a lemchân dan dungzui ah lemkuatna a hung siam ding in Synod Executive Committee chun thupukna a siam hi.

### **Bengaluru ah Kochuam Enkawltu ding**

April 30, 2023 ah Bengaluru ah i Kochuam phudaw a hi tâk dungzui in, a enkawltu ding chungchang hi SEC in a ngaitua ah, tu ah D.Th. zil ah um Rev. Eric Lienlalmuon chu Bengaluru Kochuam Enkawltu hi ngâl ding in guat a hi.

### **Moreh Kochuam enkawltu ding chungchang**

I gam buaina ziak ah Bial enkawltu Pastor-te'n Kochuamte etkawlina lam ah haksatna a um zel ziak in, thu thak um kit masia New Moreh Kochuam enkawltu

ding in Rev. Thangliansang, Nanphalong Bialtu Pastor guat a hi.

### **CKNP Chairman**

SEC 3:15 in CKNP Chairman ding ah a guat Pi Lalhrietpui chu a nasepna, mun chuam ah transfer a hi ziak pang theilo ding a hia, OM 5:2 chun a dawtna pawmpiak in a thasang ding in Pi Lhingkhovah (Vahnu), Sugnu Tribal Kochuam, chu 2023-2025 term sung ah CKNP Chairman hi ding in a guat thak hi.

### **Hinna Vâk Hawpdaw dan**

I gam sung ah buaina ziak in Hinna Vâk latu zosia kiang in i chanchinbu'û hawmthaw um tak hi a hung kihawmzâk thei tapua, bubit tak ah um Bialte tilo ngal chu a dangte hi piakna ding a kihiat ziang lo ziak in piakdaw lo in a kikawi hi. Chuleh, dâk (Post) ah kithawtte him him le kithawtdawk lo a hia, tunung ah thawtdawk thei ding dinmun ah i hung um uh a hi chun sutzawm hung hi bep ding a hi.

Hinna Vâk latu, umna kichawntate chun tu ah i umnau Kochuam ah Agent-te kiang in kihatsak hitin uh, Agent-te'n

## HINNA VÂK

Office lam in hung report thei leu kipak um ina.

### **Semtute umna siamlem**

May 3, 2023 ah kipat i gam sung ah buaina a hung um tâk ziak in, Kochuam nasêmtu umna ngai ah um thei talote dinmun ding ziagual hin O.M. in a siamlem hi:

a) Rev. Ngurthanmawia Sailo i/c Imphal Pastor Bial hi Lamka um phawt in a.

b) Rev. Paulalsiam i/c K. Sharonphai Pastor Bial, Office attach ding in Lamka um in a.

c) Rev. C. Lalrinliana i/c Kangvai Pastor Bial hi Lamka ah um intin, a thei dan dan in a bial enkawl in a.

d) Rev. S. Genlianpau i/c Chingmei Pastor Bial, Office attach ding in Lamka um in a.

e) Rev. S. Kumar i/c B. Phainuam Pastor Bial chu Chingmei Bial enkawl ding in ama In ah um in a.

f) Evan. Lianboi Neitham, Chingmei ah um chu ama In Tollen ah pansa in Kochuamte a lemchan chang ah panpitu hi'na.

g) P/P Lamgoulian Hatlei, Kangvai le Lamka ah ama In ah

pansa in a bial enkawl zui in a.

Gambuai in a sukkhak Pastor leh Pro Pastorte chungchang (OM 7:3) :

Gambuai in a sukkhak Pastor leh Pro. Pastorte ziagual ahin siamlem a hi.

i) Sugnu Pastor Rev. Summinlian hi Lamka In lua in, Office attach in, a Bial mite a thei dan dan in enkawl ina.

ii) Leilon Pastor Rev. Khuplemlal hi a Bial ah kile kit thei nailo ziak in, Kangvai ah um phawt intin, a lemchang masa pen ah a bial ah kile kit ina.

iii) S. Kawtlian Pastor Rev. K. Neihzial hi Bial ah um thei lo phawt a hi ziak in thuthak um masia Lamka a Inmun apat in a bial etkawl ding phalpiak a hi.

iv) Rev. S. Thangtinlal Suantak, Jiribam Pastor hi buaina a um zawm zel naklai ziak in a bitna mun nai lemchang pen ah In lua in um phawt ina.

### **Relief Kipedawk zat**

Tuni tiang ah gamsung buaina ziak ah Kochuam in Relief kipedawk zosia zat: ₹ 1,03,27,000

# “THINA HUAISIA TAK APAT THOKIT JESU KHRISTA”

Rev. K. Lala  
Salem Veng

*“Keima doigual hi dingah van ah kipat hung ka hipua’n, ei sawlpa dawigual hi ding ah hung kum ka hizaawi. Zia hi ka Pa ei sawlpa dawigual chu a hi, Ama’n ei piak zosia chu bangma matsua neilo in nitawp ni leh kaithe zaw leng” (Johan 6:38,39)*

**K**hawvel hukdam ding ah a na a mualsua ding hun achung ah ahung tung pan ta, mihing hin bukim a nei zia kin Jawlnei Isai in, “lungngaina nei mi leh natna he mi” ti’n (Isai 53:3). Thei hi leh, a no dawn di kha pumpel a nuam a, maleh, a Pa kiangah, “Nangma thu thu hi zaw hen” ti’n a pauchap zaw ta a hi.

Gethsemani huan ah Jesu’n thau hêkdawna mun ngei a Pathian a pawlsek na mun chun Van Lal chapa thisan chu chu zuan in, Olive thau a hêkdaw in a um ta. A khawsa- ul tang chu thisan gual in a hêkdaw nau mun ahi zia in a vatha ta. Jesu’n a ziltite tawh in Gethsemani huan a tiu a, zân an anek zaw un pindan “Gethsemani” ti umzia chu chungnung chu nusia’n Kidron “Thau hêkna” tina a hi. lui chu a kân ua, huan pakhat a chun a lut ua.

Jesu a lungkham takzet a. Pathian a buan ta, a lungkham tawp khawk inle, phatchuam ngaizaw diak in a pauchap a, a lunggim tawpkhawk in Olive

Juda khanle ziamun chu a hiatsa ahia, tichun, Juda chu sepaite tawh thiampu liante leh mimante

## HINNA VÂK

tawh meiselte, galvante chawi in a hung ua. Ziaphat achun Jesu'n ava zuan ah, la hawl uh chu "Keima hi ka hi", ati a chun a man ding te chu leitual ah a kipuk ziang tau hi. Peter in a chemzâm a la dawka, thiampu lalpen suakpa bil a satthak piak a, himaleh Jesu'n a sukdam piak a, Peter "la chemzâm kha a pâi ah thun in" ti'n.

### **Peter in Jesu thumvei a kilepsan :**

Thiampu Lal huangsung a meilum awite khat chun "Jesu nungzuite lak ah pang la hi" ti'n a kawka, himaleh Peter in "Ka hipuai" ti'n 3 vei hial a kilepsan zaw a chun âk a khuang ta (Peter dinmun haksat di dante ei ule kichan leu hin).

### **Pilat leh Jesu :**

Pilat in Jesu chu, "Judate Lal la hi em?" ti'n Jesu'n namkhat bep lêng hilo in nam zosia huap, thutak lêngpa ahi dan in a dawnhu zaw ta. Pilat in 'Thutak chu bang ahem' ti'n

Jesu'n Pathian thu chu thutak a hi dan a genzaw ta a hi.

Zia thu chu a dawt zaw phat in Pilat chu a pawtdawk a, Jesu chung thu a mawna a mulo thu Judate a gen a. Jesu chu thadaw piak ding ka hem ti'n Jesu sanga Barabba suammang, Rom sorkal do ah Judate a ding ah zalenna sualtu a hia Judate a ding ah buaina siamtu himaleh Jesu sang in a tel zaw tau a hi (Johan 18:38-40)

### **Pilat in Judate khut ah a pedawk ta :**

Judate'n Jesu sang ah Barabba Jesu thadawk dingah a têt zaw un Pilat in Jesu chu a pedawk a sepaite'n linglukhuk a khuksak ua. Puansandup silsak in sepaite'n musit takah Jesu Chibai a buk zaw un thiampu liante leh mipite chun kraws ah khenden in ti in Pilat kiangah kiko in a naw bichil phat un; Pilat in khetden ding khawp a Jesu thiamlona mulo ma leh kraws ah khenden ding

in a piadawk ta a hi. Khawvel hukdampa dingah Pathian lemkuat na chu a bukim theina dingin gitlona neilo Jesu Khrista chu thiamlo chansak a hi tai.

### **Jesu Kraws :**

Ama kraws ding kiput in Lugumun, Hebrai pau ah Golgotha a tiu munlam, zuan chun a pui tau a. Zia tak achun migilo pani tawh a khenden tau a. Pilat in “Nazareth Jesu Judate Lal” ti’n kraws lêk ah a tâk a. Judate’n “Judate Lal ka hi” ti’n zik zawn atiu a, maleh Pilat in kaziak kha ka ziak zo tai” a tia. Zia hun ah kraws bul ah dingte chu; Jesu nu tawh a suapinu Kleopa zi tawh Mari Magdalin le a pang ui. Pathian lekha thu guitun na ding in, Jesu’n “Ka dang a châk hi” a hun tia. Jesu’n uain thuk a dawn zaw in “A kichai tai” ti’n a thagau a tha tai. (Johan 19:30)

“A kichai tai” ti hi Grik pau ah Tetelestai a hia zia chu “bawlzaw a hi tai” tina a hi. A

Pa’n hi ding ati chu a hi bukim tai. Khawvel ka zotai tina a hi.

### **Jesu nâk apat thisan leh tui a hung luangdawk :**

Judate chun Pilat kiang in a keng gute khenbawng ah a luang latha ding in a va dawn ua. Rom sepaite chun a mi khetden teu chu a va enchian ua. Jesu vei leh chang ah a khetden teu chu a thi nailo ziak un a keng gu teu a khet bawt piak ua. Jesu ahi leh vang ala thi min tak ziak in sepai khat chun Jesu nâk chu asun a, tichun thisan leh tui a hung luang dawk a Jesu chu a thi min kei hi ti sepaiten a hechian tau a. “A sut sa uh chu hun en in au” tia Zekariah 12:10 a la gen lawk chu Jesu chung ah a tung ta a hi.

### **Joseph leh Nikodem in Jesu a vui :**

Arimathai khua a gûk ah Jesu nungzui chun Pilat kianga Jesu luang a va dawn a. Jesu luang a hun la tha ta. Zan ah Jesu kiangah hung Nikodem



## HINNA VÂK

khan le murra leh aloe kihel bûk sawmnga a hung chawi a, Jesu luang chu thân awng khat a chun a sial tau a hi. Sabbath bawtsia manlo in, Judate dan dik tak in Jesu luang chu vui in a um ta a hi.

### **Than apat in Pathian in Lopi tak in a kaitho kittai :**

Lalpa Jesu thisan go, Bible ahin thisan hi 369 vei taklat a hi'n. Jesu'n a thisan in thuthung thak ei siam piak. Tui leh gan thisan in mihingte gitlona a silthiang theipua'n. Jesu'n "zia no hi ka thisan ah thuthung thak chu a hi. La thasang ua pawt di chu", ti'n. Tepte thei chu;

(a) Mihing thisan in kituakpi/kituakpilo a nei lai in, Lal Jesu thisan chun khawvel a mi zosia kituak pilo a nei puai.

(b) Mihing thisan chu midang piak tâklo/thianglo a umlai in Lal Jesu thisan chun mi sual pen te thisan silthian na'n a thianga hi.

(c) Mihing thisan thathum

sung vel bep kawiphath thei ahi lai in, Lal Jesu thisan in kumtuang a dai hi.

(d) Midangte piak di'n mihing thisan atam tawklo lai inle Lal Jesu thisan chu kumtuang in le kang talo ding a hi.

Lal Jesu kraws a thi khenden in a um, than a phum in a um ti thu hi khawvel in a hethiam nalai a. Thina zo in a thokit ti hi khawvel in a hethiam zo talo a hi. Khawvel sakhaw dang mudawktute kuama a thawkit thu hiat a hi pua Lal Jesu a hi leh chu mithi kua kul kawt in le a nan zawlo a hi. Nasepte 2:24 lopitakin a tho kit tai. A thawkit na a hin thina leh thanthim a zaw zia a kilang hi. Khawvel zotu, ahi zia nial guallo in a sulang a hi.

Tepte thei khat chu 1960 kum vel a khan Prof. Frank ginglo mi khat chun Jesu thina mun vel a fang vel a. Jesu thawkit lo zia zilchian dingin nasatak in a khual chil a, himaleh a tawp a tawp a chun than sitna suangpi lian tak

kilfik chawn kha Jesu thawkit zia thipbek ah puang dawktu a hi ti a hedawk ta. Ama le Khristian a hung hi khawlaw ta “Kuan zia suangpi hi a likchawn a diam” ti lekhabu a zik khawlaw ta a hi.

Jesu’n “Keima hi thawkitna leh hinna chu ka hi. Kua le ei ging taphawt chu thi maleu le hing zing inau” a tia. Zia lei taksa thina hi tawpna ding a hi puan lopina gam ah i lutna dingua I pal thenna diu lampi

chu a hizawi.

Ama gingtute haw le thi ma leu le hing zing in au, Khrista kaithaw a hi gual in ama gingtute guala thokit ding a hui. Hinna siamtu hial a thi, vui in a um a, thina zo in a tho kit ah thokitna lopi a hizia puangdawktu a hi. A thina kibatpi ah I ki zawp tak ziakun, a thawkitna kibatpi in zia thawkitna kikawppitu ihui hi vangphat um takzet a hi. (Romte 6:5-6)

---

*Ni cheng ah ka buaipi thilte haw hi kumtuang dai ding thilte a pang kha na diam?*

*La kam a pat thu a pawtdaw masang in zia thil pathum te hi ngaitua zing in -*

*A tak tak a hi na em?*

*A pawimaw a hi em?*

*Mi lungthim su na thei thu a hi em?*

*Nangma ah um thi hitheina la nei hi Pathian thil thawn piak a hi’n, la thil hitheina la mat phatchuam na chu Pathian kiang ah la piak thuk kit thei chu a hi.*

---

## “PATEPNA”

(1 Korinth 10:13)

~ Pro. Pastor Lamgolian Hatlei  
Kangvai Pastor Bial

*“Mitin chung ah patepna vantang tilo la chung un patepna a tung kha puai. Pathian chu a ginum in, la zaw khel uh chetna la chung un tunsak pua’n a; la thawkzawna ding un chetna tawh kigual in taidawna lampi hun bawl piak in.” (1 Korinth 10:13)*

**K**orinth lekthawt hi Sawlchak Paul in AD 55 tuam ah Ephesa khua kum thum a um zaw ding kuan lam ah a zik a hi. Korinth khua hi Korinth tuipikawi leh Saronik tuipikawi kikal ah um a hi. Sumkawlvaina mun pawimaw tak leh khawpi hausa tak ahi zik in, Rome pumpi hiat kham ah khawpi pawimaw leh pawlche le a hi kit hi. Ziakiachun, gingtute subuai thei ding haksatna leh thilphalo tam tak le a um hi.

ua i zaw ding khêl ua thil phalo tunsak ngailo ding ahi a ti sek ui. Himaleh, Paul thuziak khenkhat in le Asia gam ah thawkgimna nasatak kâl ah, thawkzaw guallo a la tuak haw kha le i muthei hi (2 Kor 1:8). Sawlchak Paul leh ei uh ngeile haksatna i thawkzawlo ding tiang un le Pathian in ei puak phal hi. Zia dinmun a hin eimau ah kinga talo in, Pathian i hung bêl ua, i zaw ding khêl ua haksatna haw le hun kizo thei sek a hi.

1Korinth 10:13 hi thu pawimaw tak leh tulai khang â ding ah kituak ma ma khat a hi. Khenkhat in zia thu hi hekhial in, Pathian in i chung

Tulai le gingtute lak in thepna leh patepna lam chuam chuam in i tuak sek ua. Zia gual ah haksatna i tuakteu lak ah khat chu ahileh “thil chîn

phalo zawngsakna” a sappau ah chun “addiction” i ti seku hi a hi. Gingtu tamtak chu tuni hin nek leh dawn lam in haksatna namenlo leh zawngsakna i tuak ua, khenkhat vang in haisan theilo in a lelam tak in i addict zaw tau a, i lutthûk zaw sem sem tau hi. Haisan i nuam sek ua, ahinla thepna leh utnate a sân zawk tak ziak in eimau hatna’n i zo tapuau hi. Himaleh, Pathian in i zaw theina dingun lampi hun siam piak in a.

Insung pa khat hi a um ah, ama kigen dan in vang a vanglai ah chun, a thilbawl tapo, a sia hin a pha hileh, a hawihai diak sek hi. Ju a dawn lehle a thawl thaw jiang a hi. A Zi leh chate’n ama chu a le etkawl ziangu a ngai hial hi. A hun leh nite hun mangto in, a thilbawl hun haisan a nuamten ta, a chang in a zo ta pua, a tawp in Pathian a bêl phat in, a hun suakcha thei ham ham hi. Tuhin, ama gual tho ah zia gual dinmun ah a la kitang dente

panpi in a hun tamzawte Pathian hatna suang in a hung mang to tai.

Zia chanchin ah kipat hin zillai thupitak a um hi. Eih gual tho in, ama chungin le patepna vantang tho chu tung a hi. Duchakna leh utchakna a nei tho hi. Himaleh, Pathian in le ama zawlo ding thawkna leh patepna a chungin bangma a tunsak diak puai. Pathian in a hepi zawk diak ziak ah a thil bawl haisan thei a hi diak puai. Ama’n Pathian a ging ah, a bêl ah, a kingakna a nei ziak in, Pathian in a taidawna ding lampi a bawl piak chu a zui a hi zawi. Tuhin le eiu’n suachatna lampi chu i haw zing thei u’i. Pathian in ama a hepi gual tho in eih le ei hepi hi. Ziakiachun, i nawp phawt ua a hi chun, Pathian in ei hukdaw in a.

Hun sawttak a la kitangte haw â din zaw theilo di gual in i ngai maithei ui. A ziak chu i hai guau a, i bawl kit kha sek ua, a vel a vel ah i pukkit

## HINNA VÂK

(relapse) khak ziak mai maiu a hi. I thil chîn phalote'ú haw hi sí thâk ah pai i nuam sek ah, ahinla a hithei pua'i. Ginchat sang in i hung haisan (recovery period) theina ding in hun a lut ten ziang ziak hin khenkhat in ngak zolo in, haisan theita mawng mawnglo ding kisa in beidawna leh kingaisiatna'n ei lua dim khawlaw sek hi. A tawp a tawp ah chun i nisin hinkhua ah i thil tuakte'ú maitua ngamlo in i thil chîn phalote'ú chu i va bawl kit kha sek ua, ki pukkit zel sek a hi. I hun puksiat sek ziak ua hin a châng leh kithiamchanlona leh zachatna in ei chup sek hi.

Himaleh, zia gual ah haksatna a la thuak leh a chang ua pangzolote hun hukdawk ding leh zalensak ding ah chun a hi zawi i Lalpa Jesu Krista zia khawvel ahin a hung (Lk 4:18-19). Zia ziak chun mi kuale Jesu Khrista ah umte â ding ah chun thiamlo channa him him a um ta puai (Rôm 8:1). Pathian in mizosia khenchuam

neilo in thiam ei chan sak tai. Hun chiasa thil tung zosia chu ei thaimang piak a, hinkhua thak ei piak zawk tak ziak in (Isai 1:18). I chanchin luite sâng in Pathian in ei puihuaina chanchin ngainawp um chu mi bildaw leh gennawp a hung hizaw ta'i. Pathian zangaina chu eih â din a huntawk in (2 Kor 12:9), vangphat a um mama ziang hi.

Zia khawvel ahin chu haisan thiang kei/damna bukim (full recovery from addiction) i nei zawlo tâk un le, Jesu Krista thawkitna leh hungkitna ding chun sukthianthona ei tiam tâk ziak in i ngaituanateu leh i taksateu a la puksia kei ta chu pawmtâk ah hung kawi piak ding a hi. Ziaziakchun, i Lalpa Jesu Khrista a hung kilat phet leh, ama gual in um ding i hi tau (1 Jn. 3:2). Zia phat chuleh, lungawina bukim tak tawh i kinep phâk khêl un siamthak ah um in, Pathian in ei zawpi ta ding a hi. Amen!

# “KHANGLAITEN KOCHUAM GAM LATTE NGAISAKNA”

(Matthai 18: 13-14)

~ *Pro. Pastor C Kailianson*  
*S. Munnuam Pastor Bial*

*Tichun, a hun mudawkit tak leh, titakzet in ka hil la hiu, a vâk mang lo sawm kua leh kua te chung sâng in, a mu daw kit pakhat chung ah chun kipak zaw ma ma ding a hi. Zia gual ma chun zia mi neu te lak ah pakhat ziang manthai hile, la Pau van ah um lung lam a hi puai. Matthai 18: 13-14.*

**Thumapui :** I gam sung buaina tui sanglian gual in a kinawkung zung zung ziang ah, gam leh nam a buai tâk ziak in gen tam ngailo in i kochuam le nasa tak in suk liam in a um ah, i Kochuam Biak In tam tak hal siat leh suksiat in a um ah, I kochuam mi tam tak te vang chu bitna ding hawl in gam chuam chuam ah tai dawkin genthei leh haksa tak in tu tiang hin a um zing ui. Zia gual hun haksa i mat zing lai a hin, Pathian in a chapa changkhat neisun thisan man tam tak ah a tat daw Kochuam a ding zing

ah, ama i biakna mun uh In te khawisiat ah um in, a mite khet zak in um maleh a hepina dawng zing Kochuam mite a um zing laisia chu sukling zo lo, suksiat theilo Kochuam a ding zing hi ti hih Kochuam mite'n i gin bep hilo in i kingakna'u hi zing thei leh ut a um ma ma hi. Zia dungzui a chun Kochuam a din zing lai sia chu, Kochuam mite'n Pathian Lal Gam kek lianna ding in mawpuakna I nei zing hi ti hih I pe chak zing ding in dawi a um hi.

I gam buaina hih a gen khaklo thei lo sek a, I gam

## HINNA VÂK

a buai ma khan, khawtâng hinkhua, Kochuam hinkhua, sungkuan tin leh mimal tin hinkhua kha a zia zia um in, a la kichia thei ham ham a. Amabochu, gam a hung buai tak tak chu Kochuam, khawtâng, sungkuan leh mimal hinkhua Khrista ah i kibulphuna (Foundation) det tak tak zo lo a dia aw ti thei hial in haw ling ah um in, i buai vung vung mai uh a hi. Zia lai tak a hin, Pathian leh Kochuam ah i kingak zaw lo zia a kichian deu deu a, Kochuam gamlatna nasep, kampau, umchan, tawidan leh lunggel mu ding a tam deu deu hi. Et liam mai mai thei leh ngaidam mai mai ah chia liam sak mai ziang thei hi ding in a kilawm puai. Nasa tak ah malâkna a um lo chun, tunung ah a gâ namsia leh hût, nek tâk lo i luak ding uh chu kichian tak in a mulâwk thei hi. Ziakiachun, Pathian Lal Gam sukdetna ding leh kek lianna ding ah pawimaw pen pen khat Kochuam gam latte

ngaisakna hih ngaitua khawm ding i hiu. Zia mawpuakna gasua tak ah sêm piting thei ding pen chu Khanglaite a hi zia un, Khanglaite lam nga deu ah zîk ding I hiu.

### **1. Kochuam :**

Hepina tâwp um lo, hepina têpi ding um lo ah ei hepitu Pathian chun a chapa chang neisun Jesu Khrista mangcha a hepina a hung suklatna chu lei mun tâwm pen ah, thina tâwm pen thing Kraws ah a hi. Lal Jesu Khrista, Pathian chapa chang khat neisun, Pathian leh mihing in a Mo ding leh kumtuang ah a kichenpi ding in a thisan in Kochuam a hung din hi. Kochuam chu ama Jesu gingtute â ding ah bel'h lo thei lo, i kingakna ding leh i kinepna subutingtu ding ah Jesu hung kit ding i la ngâk khawmna mun uh a hi. Sawlchak Paul vang in Khrista chu a luchang a hi'n Kochuam chu Khrista taksa a ti hial a hi. Ziakiachun, Khrista leh Kochuam chu thil

khen thei lo a hi.

Kochuam dinmun hechian ma ma tute lak ah khat, John Newton chun *“Lalpa Kumkhawtuang khawpi chu, lungsiat ah lei lutsak leh; khawvel mi’n ei entâwm maleu, La min bep suang zing ta’ng ka”* a ti hial a hi. Kochuam neitu hechian ah, Khawvel kochuam ah mihing fel zaw lo zia leh mihingte ziak ah khawvel Kochuam, Khrista taksa a buai sekte hih a hemil kei puai, ahinla, Pu Newton in zia lâ hih khawvel Kochuam, Khrista taksa a muchian ziak ah a siam hi in a chanchin suitute chun a gen ui. Kochuam muchiantu leh hechiantu te chun a lul zia a hechian ma ma’u a, Kochuam ah um khaklo ding lau ma ma in, Khrista taksa Kochuam gamlat khak ding lau tun tun in a kiveng’un, um theina ding in nasa tak in pan a la sek ui. A ziak chu, Kochuam chu lei leh vân siamtu a thisan man tam tak ah ei tan dawktu Khrista taksa

a hi tawp hi! Ahinla, thil tam tak ziak in Kochuam gamlatna a lachang ah, Kochuam gam lattu a pung deu deu hi!

## **2. Kochuam Gamlatna chu bang a hi em? Bang ziak?**

Kochuam gamlatna chu thil tam tak; thîldan, ngaidan, suidan, gêndan chuam chuam in sukchiang thei in a, keima’n khaikhawm theina pen ding ah ka ngaitua chu *“Gingtu leh Khristian sungkuan te’n Pathian sang ah Khawvel thil a ngainat zawkna’u chu Kochuam gamlatna a hi”*. Zia i khaikhawmna’u hih i pawmvek ding’uh hi leh chu, Kochuam gamlat lo sek hih ki um khel ding in gingchak a um puai. Ahinla, Kochuam gamlatna chu ama Jesu ah kituai thak ah kitât hiam thakna in gual ei zaw sak sek hi. Zia zing lai tak ah chun gamlapi a la tung man ta, Kochuam huang sung le nai ngam ta lo, Kochuam ah rawngbawltute ziang le mu ngam ta lo te hih a hui i ngaitua ding leh i buai pi ding chu.



## HINNA VÂK

Khen khat chu Zu leh sa ziak ah Kochuam gamlat ta, khen khat chu numeipawsalna diklo tak ah mat ziak a te, khen khat chu nêkgûk-châk gûk ziak a te, khen khat chu Insung kibuai ziak a te, khen khat chu lawi leh pai ziak a te, dûâm ziak a te, a ziak tam tak um in ah, a ziak i hawl dawk ding chu i kainaina ding ah matchak pawimaw pen te lak ah khat a hi ngal hi. Chun, Kochuam huang sung ah um zing, rawngbawltu pawimaw ma ma te'n i hiatmil kei lo ding ah pawimaw chu, kei rawngbawl na ziak leh kei muk leh kam kisum zaw lo ziak in, mi'n Kochuam a gamlat kha em ti hih i ki et zing ding leh i kivên zing ding a hi.

“Kochuam chu a kinei sak sak â hi ziang a hi” ti ah i gen minthang ma ma ziang'uh hih, a diklona tiang a um hi! a nei tu chu Jesu Khrista a hia, a neitu lo nana na chu kinei sak lo ding a hi, Kochuam rawngbawl na ah Lal Jesu'n mun lai lung chang lo ah, a kinei sak bîk i um tak leh

buaina lam a kimanaw tai tina a hi. Kochuam ah rawngbawltu zosia chu a kibang vek i hiu ah, kizâtua thiam, kimitvêntua thiam vek a pawimaw tak zet hi. A neitu dawi dan leh a neitu pha sak dan ah rawng i bawl chiat nâk'uh chun i buaina' u tam tak hi veng ding a hi.

### **3. Bang ziak ah Kochuam gamlat chu khawk a hi diam?**

Khawvel Kochuam hin titlona leh diklona tam tak a nei sek ah, gênthei leh gêntheilo buaina tam tak nial gual lo in a um hi. A ziak chu, bukimlo leh ngaidam ngai zing Khrista hepina zâl bep ah rawngbawltu mihingte'n a etkaw! nak lai ziak a hi. Mihing hîna lam mu sek lo tute leh Khrista hepina zal ah rawngbawl seklo tute â ding ah chun Khawvel Kochuam a hin um theina mun leh um utna ding ziak a um sek puai. Zia gual mite chun “kochuam pawl a theng a theng ziang sek ui!” Zia sang a le khawk zaw chu, Kochuam him him gingchaklona leh ngaisak

ut tâk lo ziak ah Kochuam gamlatna hih a hi. A nutsia leh a gamlat Kochuam chun a thuak pua, ama ma taksa leh thagau in nasa tak in a thuak sek hi.

Eimi te hih Khristian ginna hung lut masang ah pat khawtâng khankhua nei te i hui ah, gindan, khandan, chawndan khawtang ah kizil ah a punpi khang khawm, ne khawm, dawn khawm, zil khawm te i hui. Zia haw cheng cheng hih Khrista ginna zal ah Kochuam in ei huai khawm piak vek ah, Kochuam sung ah pat in i zil ta' u a hi. Kochuam chun sungkuan kitup lo tak tak cha leh nau khankhua ei zilsak ah, a ta vâl ta ding, a ta sia ta ding cha leh nau sim sen lo gual ei vên tup piak in ei siam phat piak a hi ti hih nial gual lo in i gam leh nam tuanthu, thusim leh khankhua a pat in i mu vek thei hi.

Kochuam gamlatna a let deu deu dungzui in khawtâng leh sungkuan tin a buai deu deu

ah, khawksaklona le a lian deu deu hi. Numeipawsalna thânghuai tak ah matte, khamthei-guithei, kitha-kimat, kizuaui-kithiep leh nekgûk-châk gûk te'n langsâl tak in sungkuan tin ei lua dim in ei khawisia ta a hi. Rawngbawltu Pastor leh Upa-te sungkuan ziang le ei hawi ta pua, ei sukkhâk lo him him sungkuan mu ding a um ta puai, a khawp khawp mai hi. I insung uh leh i khawtâng uh buaina tam zawk hih Kochuam gamlat ziak a ngaw thei mai gingchak a um hi. I khawsung leh veng sung ah khamthei bawl pung deu deute, pau thânghuai pung deu deute, nekgûk-châk gûk pung deu deute haw hih Kochuam i gam lat tâk ziak uh a hi dia aw (Kochuam in a mawpuakna a ding gual ah a zaw lo a ta dia aw! ) ka ti vûng vûng a hi.

#### **4. Bang ziak ah Khanglaite'n Kochuam gam latte ngaisak ding?**

Kochuam gamlatte kainai

## HINNA VÂK

leh kailut kit ding chu bang tik lai a le Kochuam lungthim leh thiltup ah a um zing a hi. Thil tamtak ziak in zia hih ngaisaklo (ignore) in a um sek ah, Kochuam ah rawngbawltu tam tak ziang in le hun tin in pawimawna mun a la kipia kha sek lo a hi. Ahinla, Kochuam dinna san tak leh a dinna ziak te lak ah pawimaw pen pen te khat chu Kochuam gam lattute ngaisak hih a hi. Kochuam mi zosia'n i tepte zing ah i thei dan dan ah malâkna i nei zing a kul in a pawimaw tak zet a hi.

Kochuam gamlatte ngaisakna ding ah malatu ding vek l hi zing lai'un, nasa tak leh hat tak ah, a punpi ah malâkna bawl thei ding chu Kochuam Khanglaite a hiu a, amau khêltha ding kuama a um puai. Chun, mimal tak ah ka ngaituana chun, Khanglaite lak a hin Kochuam gamlatna hih a khawk diak a hi dia aw ka ti ut a hi. Khawvel thiamna leh pilna a sang deu deu ah, thiamzilna lam leh sum leh pai hawl na ziang in le

Khanglaite hin mun tin a lua ziang ta. Zia dungzui a chun khawvel nawpchenna ding thil tamtakte hi le Khanglaite ut zawng ding leh Khanglaite thatnawpna lam ding ngen a hi. A huntâwk um ta lo in khawvel hih zâ in a ki zap thaw ziang ta a hi. Zia dinmun tak a hin nasa tak in Kochuam gamlatna hih Khanglaite lak in a pung deu deu ziang hi. Zia gual dinmun ah i chia zing chun, i gam a hin nauchaga hung tam deu deu in tin, Thiamzilna school In sangin Rehab centre hung tam zaw'n tin, Pen leh khutthiamthil ah nek i hawl sang'un hiam leh thal in nek hung kihawl in tin, kisuang tak mai ah Pu leh Pa ginum-taima nei te hih i tu leh chate'u in pu leh pa ginum nei ta lo ding a hiu!

Zia haw cheng ziak a hin, Lalpa'n a rawngbawltu Khanglai ginum, Kochuam gamlattute kainai ding leh Kochuam huang sung ah kailut kit ding in ei mamaw a hi. Zia

ngaidân hih nasa tak in mipi leh nautâng lak in a lian ma ma ta, Kochuam in le Rawngbawlna lam ah mani kietna i nei let ma ma leh tulehtu ah a bei'h nasat ma ma thiltungzing (issues) a hi. *I thupi'n a tup lam a hi lo ziak in ka hung zik be ta lo mai a hi.*

Seppatni Khanglai kikhawp hih a bulpatna bep a hia, Khanglai tamtak chun zia kikhawp hih i Khanglai rawngbawlna ding'un i sên den ta sek'uh a hi. KKP fund-drive leh activities te hih i Khanglai kalsuanna ding ah i malâkna'u a hia, i kikhawpna leh i activities te zosia hih Kochuam gamlatte kainaina ding a lemchâng lakna mang zing thei le hin dawi a um hi. Kochuam leh KKP huang sung ah umte â ding ah a nuam thei pen ding ah i guanggal khêl lam'un, Kochuam gamlat ta te thîl zing kawm ah i kiheituak-i kiheituak zing pawimaw tak zet ding a hi.

I gam sung ah hin ginum leh

taima, Pathian zâ leh mitmei veng zing, panpi ngai panpi leh kochuam gamlatte ngaisak thiam rawngbawltu Khanglai tam tak Lalpa'n ka nei hi! a ti ngei ka kinem ah, a tite lak in Tangphai Synod Khanglai bang zat I pang ve thei ding'ua aw? Mimal tak in a tam ngei ka kinem hi. Ahinla, Khanglai Pawl rawngbawlna a hi ziak in mimal thu leh felna sâng in a tângpi ah i fel khawmna a pawimaw ah, a tângpi ah i ngaikhawkna a kul tak zet a hi. Kochuam gamlattute ngaisakna chu KKP'n a hung bawl tak leh a nawt nawtna lam a mâi chuai chuai mai a hi, ti hia zingin i pawlpi malâkna sumuang thei ding, sulaklaw thei ding lunggel, umchan, tawidan leh malâkna nei lo ham ham chu Khrista lungthim tawh kituak ma ma ding in gingchak a um hi. Sawlchak Paul in rawngbawltu khanglai Timothi a tîlna hih tepte zing pawimaw in ka hiai, *"Himaleh, Pathian ngaisakna chu bang*

## HINNA VÂK

*lam lam in le a phachuam hi; tu'ah hinna leh hinna hung tung ding tiang ah thutep nei a hi. 1 Timothy 4: 8.*" Pathian ngaisakna chî i tu'h det nak'uh chun, Kochuam gamlatte ngaisakna nâ hih a tam zaw bawl zaw hi ta in a ngai thei mai awm hi.

### **5. Jesu Khrista'n bang gual in Kochuam gamlattute a ngaisak diam?**

Kochuam gamlatte ngaisakna dân ding thil tam tak sek daw sa a um ta, Pathian mi, mithiam tak tak te'n a bawl'uh i mu khak tak ngei'uh gingchak a um hi. Jesu Khrista'n Kochuam gamlatte a ngaisak dan ding Belam mang tekhinthu a zilsakna ah pat a hin zillai zil daw gua ding i hui.

Jesu khawvel ah a lenlai ah khan, a umna Kochuam dinmun a zil Chiang ma ma ziang ah, a Kochuam umna kha Juda sakhua a hia, a ma'n a mu thei ziang sakhua mite, a bîk tak mai ah a hotu lam leh puitu lamte khan a

kochuam ua mipite kha a ngaisak khawlo'un a kilang hi. Sakhua lam puitu, Kochuam mi leh sa te enkawltu ding leh ngaisaktu ding te khan Kochuam gamlatte ngaisak malak ah amau angsung ding bep ngaitua in rawng a bawl'uh hi in a kilang hi. Zia lai tak dinmun a hin a hi KKP rawngbawltu Tangval fel tak mai Jesu Khrista'n tuni tiang a KKP rawngbawltute'n I ettawn ding uh malakna a hung gen daw k a hi.

Sakhua hotute'n migilo te tawh um khawm, ne khawm leh dawn khawm sek hi in ngawna a bawl ua, zia tak ah migilo ah a gen te'u hih tulai Kochuam gamlatte Kochuam mi te tawh a kikhiakna'u tam tak um ding in gingchak a um puai. Zia ah sakhua mite lunggel leh tawidan a pat hin Insung, khawtâng leh Kochuam ah migilo ah a simte'u hin Kochuam naina ding lungthim a nei lo ding ziau chu a kilang chian ma ma hi.

Tulai tak Kochuam dinmun tawh i thîl khawm chun, Kochuam sung ah rawngbawltute'n, a bîk tak ah KKP rawngbawltute'n i kochuam mi leh sa Kochuam gamlattute, i ngaisakna ding a hin lunggel piting tak mai, Khrista Hepina tawh rawngbawlna nâ i chiapi a ngai zia nial gual lo in a kilang ah, Lalpa Jesu'n a chiapi zil ding i hiu:

***Mangthaite hawl ah hukdam ding ah hung a hi:*** A nungzuitu te hin le Kochuam gamlat ah mangthai zingte ngaisak ah Lal Jesu Hukdamna huang sung ah puilut I mawpuakna i kawi zing ding a hi.

***Sawmkua leh kua nusia ah a vâk mang pakhat ngaisak:*** Zia lungthim, lunggel leh ngaidan hih tulai khang ah vang thil awmlo gual tuk a hi. Ahinla, zia gual lunggel lo a hin chu Kochuam gamlattute ngaisakna hih lawting zo lo ding a hi. Pakhat hawl dawknâ ding a chun, tâng a te kal a ngai

ah, theina zosia sua a panlâk a ngai kit ah, chun sawmkua leh kua te nutsia a ngai nalai a hi. Kochuam leh khawtâng a le kochuam gamlattu khat ziang le thâsuak lo ah kailut kit ding ah mawpuakna I nei zia I Lalpa'n kichian tak in zia tekhinthu a pat hin ei zilsak a hi.

***Sawmkua leh kua te chung sang ah a vâk mang pakhat ziak ah kipâkna:*** Zia gual ah malâkna hih a thawn in a um diak pua, Lalpa Jesu'n belam mang mutu kipâkna ding a gen hih thil neu tak a bat vang in kipâkna a dawn ding hih khawvel thil in a piak thei hi in a kilawm puai. Sawm kua leh kua a neisa um zingnapi in a vâk mang pakhat chung ah a kipâkna hih khawvel thîlna ah chun awmlo a hi, ahinla, Pathian thu a chun thil kipâk um zaw a hi. A ziak chu Hepitu Pathian chun nang leh kei thîl gual in a thîl puai, ama â ding a chun a vâk mang ngaisakna lungthim, veinat kha a

## HINNA VÂK

pawimaw zaw a hi, a Zia gual veinat, ngaisak leh malâkna a um tak leh mite mitmu ah thil neucha ziang ah kilang hile, Lalpa'n Kochuam gamlatte ngaisakna lawting ding in ei malzawl ding a hi, thil neucha hi ah kilang hin khawvel in ei piak thei lo kipâkna leh limna dawium tak mai, kochuam gamlatte ngaisak rawngbawl na lawting ei pia ngei ngei ding a hi. A ziak chu, zia mi neute lak ah pakhat ziang manthai le phal lo tu Pathian chun Kochuam ziang le nai ngam ta lo ah mineu ah kikawi ta te ngaisakna leh malâkna chu a lung lam tak hi ding a hi.

**Thukhâkna** : Khawvel chia dân gil tak ah i thil chun Kochuam gamlatna hih khawklam manaw zaw deu deu ding in a kilang ah, a hi ding mawng le a hi him hi. Ahinla, Khrista Hepina ziak ah rawngbawltu Kochuam khut leh keng Kochuam Khanglai te

a um laisia, Kochuam gamlatte ngaisakna hih chawl puan tin, a thisan ah ei tan dawktu Khrista dawidan mineu pakhat ziang le mangthai lo ding ti hih sukpitng ah malâkna hing zing ding a hi. Khawvel khangto deu deu in i ginna' u suangphum chu haw ling guan melma leh do gal te'n ei do maleu John Newton in a gen gual in "Kumkhawtuang suangpi kingâ chu bang in em hiling thei ding? Hukdamna bâng ah kiûmin, A gâlte lau nawt pua'n a"; i rawngbawl na' u chu Kumkhawtuang suangpi Khrista ah a kingak zing nak chun, bang gual huipi'n le suling zo puan tin, i hukdamna' u bâng Khrista Hepina ah i ki ûm zing nak'uh chun Kochuam gamlatte ngaisakna nâ chun ga dawum sua in tin, nek sên lo ga tui tak in Kochuam mipi châwm hing zing ding a hi. Khaile! Pan la thak hi tiu le!...

# “PATHIAN DOIGUAL LUNGNGAINA”

~ Pi Hoipakkim  
CKNP General Secretary

*“Pathian doigual ah lungngaina chun hùkbinna ding lungheina a sua in, kisik a um puai; Khawvel lungngaina’n vâng thina a sua zawî.” (2 Korinth 7:10)*

Lalpa Jesu Gethsmani ah a pauchap lâi khan, a lungngai in, a lunggim ma ma ah, a masang a thil hungtung ding chu a hechian ngal a; ahinla, thi tiang in Pa thu a zawm a hi. Lal Jesu nungzuite lak a Peter leh Juda te kha vak thîl le’u hin; Peter in Jesu a kilep san a, Juda in thiampu lalte kiang in a zuak ahi kha. Jesu chu Pathian Chapa a hi hezing ngâl in ziagual a khan a la bawl ua, a thil bawl teu ziak in lungngaina, kithiammawna leh kisîkna a tun ta ahi. Ahin, Peter in a thilbawl chu kisîkna leh kisiamthakna in a nei a, Jesu nungzui a hina dawl ah mawpuaknate a subuting a, thi tiang a ginum in a um ah, Juda khan vâng chu a thil bawl diklo kha huaise tak in a thi pi

a hi.

A.D 55 hun lai ah Korinth khua umdan i Bible ah i muthei dân a chun, sumkawveina mun pawimaw tak leh khawpi hausatak a hia, khawpi pawlche tak le ahi kit a hi. Gindân thu a ginumlona ate, gindân diklote, thânhuaina thu a te’n Kochuam a sukbuai dan te i muthei a hi. Korinth lekthawt panina a hin sawlchak Paul in, a chung ah diklotak ah ngawna zat chuam chuam a bawlna chung ua a lunggêl leh a lungkiakna chu kipakna thupi tak a hung chan dan a zik a hi.

I gamsung ua gingu masate zâl in thagau mitvâkna i la chang ua, a lopi ngei hi. Zia Pathian hiatna apat chun



## HINNA VÂK

Thagau lam hukdamna i hiat uleh i chan bep uh hilo in, Pathian maljawlna nasatak dawngin, taksa khawsakna lam inle mitvakna i hun nei khawlaw ua; chêndân, khawsakdan ate'n leh nek-leh-dawn thu in le masawn leh changkâng tak in i khawsau a, dinmun niamtak ah umte chu Lalpa'n ei dawmsâng ta a hi. Lalpa chu lopina i piau a hi.

I pu-leh-pa te'û hun lai ah tawmngaina, titakna, kihepituana leh kisawmdawltuana lungthimte haw kha, tu khang a hin, mâni masialna leh mâni kihepina'n a sângtha zo ta, a khawk takzet hi. I gamsung i et chun, anche-lohing ah malsawmna, chitnathiamna ah malsawmna leh kawngbangkim ah malsawmna i dawnte'û hi Pathian dawidan tak in i mangcha zo talo un a kilang hi. "Pawlam a pat mite hin banggual in eimau leh i gamsung te'û hi ei hun thîl diam uh aw?" ti ngaituana a um sek hi.

Dâuam tak in tu hun ahi'n nam kikâl buaina ziak in haksatna tamtak i tuak ua, mitin in Pathian Biak In ah te, mimal ah te, a lemchân dân in Pathian i buan un, i ko uh a hi. I pauchapna'û thupi pen chu gîtlo thupha chawi leh Pathian umpi dawtna a hi pên hi. A hi! A hi ding ma ahi. I gamsung dinmun te'û chu, i het chiat gual un, Pathian dawidan ah i khawsak zaw tâklo ziak ua Pathian thununna i chung ua tung le hithei a hi. Nek-leh-dawn thu ate, numei pawsal kikâl ah thanhuaina ate, nêkgûk chângkûkna ate, thil diklo he ngâl a ngaizam te leh thisan suana hial te'n a dimzo ta a hi. Pathian hing ho te i hi ngâl ua, Pathian i chung un bangchan zângâi nalâi ding a i dawi uh a hi em? A kikhêl ma'n, ei hepi zing Pathian a pat thununna (kona) chu i pawimaw uh hilo maw?

Paul hun lai ah Korinth khuagual in sumkawveina a phaleh-sia umna mun i hi tau

a; Pathian hiatna lam inle, gindan dik a pat ei kaihêk ding tamtak a umta a hi. Mimal ngaituanate ziang inle, a diklo leh Pathian dawidan hilo thilte, he napi a, ngâizam mai mai te hi i chindan uh a hung hita a hi. Gamsung vaihawm te'n dinmun niamzawte dawpkân na ding guanggalna zat chuamchuam te a pat, a chang didawl chang pha talo, a bawl thei/gên thei zawte chang zo ta; meithâite In sakna ding meithâilo chang, anchang ki hawmte a chang di dawl chang ta lo, tuilo bawlte sum-leh-pai chan ding a bawlo te chang, scholarship i mu ding dawl hilo lâk thei ding dan ngaitua hâm hâm, mani lawkna ding a hi po leh khawksakna him him nei talo Khristian i tam talaw tau hilo maw? Zia gual ah sum kailût thei leh bawl theite chu mipi ngaisân leh ên-um in i ngâi gam tau a hi. Zia haw bawl zing kawm in Pathian hing i ho zing tho ua, i thilbawl, i umchan te'u chu Pathian bia kawm in,

i ngâizam to pek tau hi. Zia haw hin, i biak uh Pathian hing chu a lung a awi na diam? ti hi ngaitua thak a kûl takzet hi.

Khawvel ah hinkhua matna ding leh khawsak to na ding a hin, Pathian in mihingte hi mawpuakna lian tak ei pia; zia chu thil pha zaw ding ngaitua theina lungchang a hi. Zia hin taksa leh thagau ah thil tamtak a huap a hi. Pathian hepina leh chanchinpha ngaitua theina, hisêl zawkna ding, Insung khawsak thei zawkna ding, khawtâng nuamzaw leh khanto zawkna ding, bitzaw' um theina ding leh thilpha zaw him him ngaitua theina lunggêl i nei hi, i mawpuakna a hi. Hisêl zawk na ding ah chun, mimal tin in bawl di leh bawlo di tamtak i nei gual tho un, thil hawizaw leh nuamzaw um theina dingte le i mawpuakna'u a hi. Tu i gam buai dinmun ah ei sukha mama chu, bitzaw' um theina ding ah i mawpuakna'u i zawlo uh hi a hi. I pu-ipate'u

## HINNA VÂK

thuching in, ‘Sangâ’n a tam a thipi in, mihing in a tam a dampi hi’ a la ti’u. Zia thuching mantam tak neitute hi bang zia ah ki chêng bûmlo a diam? ti hi dawtna lian leh ngaituana sukha mama ahi. Aziak tamtak a um maithei, ahi’n bitzaw ah i khawsakna ding un, chênkhawm vâi lêl hitiu, u-naute.

“La bawsiatnau a tam dan, la gitlo nau a nasat dante, mi diktatte la sugenthei un, gawlgûkna la lau ah, vaihawmna kawtkhak bul in mi tasamte la sawndawk ui, ti ka he ngâl a.” Amos 5:12 na a chun Israelte gîtlo dân i mu a hi. Zia gitlona leh diklona a pat suachâtna ding ah chun lampi pakhat bep a um a, zia chu Pathian hepina dawng zêl thei ding ah diktatna a hi. “La hintheina ding un gitlona hilo, phatna chu hawl tau in... Gitlona huau inla, phatna ngaina tau in, kul kawtbul ah vaihawmna dik din tau in, ... sepai hawnte Pathian chun

lungsiatna a hun nei khâk leh.” Amos 5:14,15 na in i mu a hi. Pathian hepina tawpchin neilo chun, Israelte chu sual in ki tâllut sek ma leu, ti taktak a kisik ah, Pathian lam ah a ki hei kît tak ua leh a hepina angsung in a la lawp sek a hi. Ei uh le Lalpa’n ei hepi dan hi a lopina maizen e! Pathian in a chate ei kona hi a thupi a hi. Tuni tiang a hin Lalpa’n hun pha, hun kipak um ei pia, taksa beplo thagau natiang mangthai thei ding tamtakte i um lai un, ginglote mangcha in Pathian kona aw i hiau a hi, ti le hin ki gen khial khel puan a. Nang-leh-kei Pathian lungsiatna chang tâk lo leh a lungthim sunatu i hî zing lai in, Lalpa, a mite hepi tawpchin neilo ah hepitu chun, Ama lam i ngat kît theina ding un, mimal leh i gamsung gîtlonga te’u thupha chawi leh simna hi i hi mâkmaw uh a hi. Sawlchak Paul chun “Pathian dawigual ah lungngaina chun hukhinna ding lungheina a sua in, kisik a um puai” (2 Korinth

7:10) a ti a hi. Zia zia k chun, tu ah i lungngaina' u hi le Pathian dawigual ah lungngaina a hi chun, lungheina leh simna ei neisak in tin; zia chun hûkhinna nei thei ding i hiu, ti i mu thei uh a hi.

Tulai i gam dinmun i he zing ua, lungngaina'n nasatak in ei bawm ah, in-leh-lo te chên in, lusûnna te i tuak ua, panpitu ding khawvel thil in i nei zo puau a, i lungngai ua, thasiatnate, lungthim natnate, siatsonate'n i dim uh a hi. Ziate haw hi Pathian hiat lokâl a tung a hi pua, Pathian bangkim siamtu leh bangkim chung ah thuneitu chu i Pathian uh a hi zia k in, Ama'n taksa-leh-thagau ah kinepna thak leh hinda'n thak ei siam piak ngei ding a hi. Job chun a chate leh a gangual, a nei-a lam zosia a chên lai khan, Pathian chung in a phunnawi pua, a hun nunung lam ah Pathian malsawmna a chung a hung kile kît ding chule a he diak lo

ahi. Ahin, Pathian a ding ah a ginumna a thâtham pua, Pathian in vangphatna a lêni in a maljawl a hi kha. Kanan gam zuan a Mosi'n Israelte a pui lâi khan le, ginna'n a zuan mai uh a hi kha! Tu hin le haksatna gen guallo i tuak ua, In leh lo leh hinna chên tamtak i um bâk un, a sak-a thang in i ki thêzâk uh a hi. Ahin, Pathian dawidan ah lungngai i hi nâk ua, Ama ging ngam zing i hiu chun, i tunna gam chiat u chu, ei uh a ding ah kuaizu leh bawngnawi luanna gam hi thei a hi, ti hemil pua hi tiu. Pathian in a hepi te a ding in bangkim a phatna ding un a bawlpiak sek ngâl a. Zângaina dim Pathian chu kumtuang ah le danglam ngailo a hia, zia Pathian chu i Pathian uh a hi ngâl ah! I lungngainate' u Pathian dawidan a lungngai ihiu chun dan ni takleh i lungngaina' u maljawlna hung chang ngei ding ahi.

Lalpa lopina chang ta hen!

# “I CHUNG UA LALPA A LUNG DAM DING PAWIMAW A HI” (Kisimna Lekhabu 14:8)

~ *Evan. Jamkhawpau*  
*Lingsiphai*

**I** Bible changtelna hi Israelte Pathian in a tep piakna Kanaan gam entha dingah mi 12 a sawlte’u report na thu a hi. A lak ua mi 10 in zaw ding gual ahilo thu leh a huphul dan te’u a report ua. “A gam ah chengte chu mihat tak takte a hiu ah, a khawpite’u chule lian tak tak leh kul ah ki-um ngen ahi. Chuleh, zia gam ah chengte chu Anak suan leh pâkte, milian chite a hiu in, ama’u haw lak a chun khaubepi gual bep in ka kilang ziang ui” atiu a hi.

Ziaphat a chun mipite chu a lau ma ma ziang tau ah, mipi zosia chu aw ngaitak ah kiko in, zankhua’n a kap tau a hi. Israelte zosia chu Mosi leh Aron chungin a phun tau ahi. “Aigupta gam a khan a la thi ziang kha ki hi zaw maileh phazaw gamcheng ding hiven, ahilolehle, zia gamthip a hin kithi zaw maileh! Mite chemjam ah thi ding bep ah, bang ding ah Lalpa’n ei la puidaw ahi tam! I zi leh chateu mi gal anchak ah a pan sang un, Aigupta lam ah kilekit ziang leu hin phazaw ma ma lo ding a hem? I hotu ding uh tel hitiu in, Aigupta lam ah chiakit

mai hitiu” ati sau sau ziang tau a hi.

Ziaphat a chun, Nun chapa Joshua leh Jephuneh chapa Kaleb chun a puanak te’u a bawtthek ua; Israel mipite kianga chun, “Ka va etthakna’u gam chu gam phatawp a hi. I chung ua Lalpa a lungdam nak chun, zia gam chu ei puilut intin, gam pha ma ma khuaizu leh bawngnawi luanna gam chu ei pe ding a hi. Lalpa do in hel da phawt unla, chuleh, a gam ah chengte chule lau kiu in; ei uh a ding ah anchak bep ahi ngal un; amau venbitna chu lakdaw ahita’n, Lalpa’n ei haw ei umpi hi; lau him him

kiu in” a ti tau ahi.

Ziagualmachun taksa leh thagau lam ah i kidopiteu haw hi ei haw tawh te in a thupi’u ah, thil a bawlthei ua, tam le a tam ua, i zaw ding gual uh ahipuai ti i hiatsau ahi. Himaleh, i chung ua Lalpa a lungdam nak chun, Ama’n ei panpi intin, gualzawna chu changthei tho ihu ti he zing hi tiu in, i chung ua Lalpa a lungdam na diam ti hi i ngaitua zawk ding ua pawimaw zaw chu a hi. Unau nang leh kei, i nisin hinkhua matdan ahin Lalpa i chung ah a lungdam na diam? Lalpa i chungah a lungdam lo chun ei panpi pua’n tin, guallel kha thei ding ihu ti hi i hiatmil lo ding uh a hi.

Lalpa a chung ua a lungdamnate chu, ama’n a panpi a, zawna a chang sek uh a hi : II Khangthu 20:1-24 i et leh Jehoshaphat galdona thu a kimu a hi. Thangko pakhat in Jehoshaphat kiangin, “Edom gam tuisuagiat gal lam ah kipat mi tamtak nangma hun do dingin a hung kuan un; tuhin Hazazot-Tamar mun a

hung tung tau hi” a hung tia. Ziaphat a chun, Jehoshaphat chu a lau ma ma ziang ta; Lalpa a hun bel ah, Lalpa lunglam a hun hawl ta a hi. Juda gam pumpi ah anngawl ah pauchap ding thupuan a hun bawl ta a hi. Juda mipite chule, Lalpa lunglam hawl in gamtin a pat a hungkhawm tau a hi. Chutiachu Juda mite zosia Lalpa lunglam hawl ah, Lalpa ma-ang ah a zi a chateu leh a tuteu tawh a din chil chel ziang phat ua chun, Jehoshaphat chu Lalpa kiangin a hung pauchap ta “ Aw Lalpa ka Pathian uh, nangin zia gam ah chengte hi la mipi Israelte ma-ang ah la nawdaw piak in, la gualpa Abraham suan leh pak te’n kumkhua ah a lua ding ua la piak hilo ahem? Ka lua ding ua lei piakna gam ah kipat ei nawdawk dingin a hung kuan tau hila! Aw Ka Pathian uh, ama’u chung ahin vai hun hawm lo ding la hem? Ei hung do te haw hi ka zaw theina ding un hatna bangma ka nei puau hi. Bang pen bawl ding ahem tile ka he ta puau in, Nang bep ka hun etthak

## HINNA VÂK

mai uh la hi tai” tiin a hung pauchap ta ahi.

Ziaphatchun Lalpa’n le, Ama lam hun nga ah ama lunglam hun hawl mipi a ma-ang ah ding chilchel ziang haw chu a mu in a chung un a lung a dam ma ma ziang ah. Hitihin a hun genta a hi. “Ngai un, aw Judai gam ah mipite leh Jerusalem khua ah chengte leh Lalpa Jehoshaphat, zia mipi tamtakte hi lau kiu inla, lung le lungdawng diak kiu in, kidona hi nangma’u a ahipua’n, Pathian a a hizaw ngal a, zia kidona ahin nang haw la pan uh le ngai pua’n a; La panmun chiat un ding chilchel unla, nang uh a ding ah Lalpa’n a hun zaw piak dan chu a la en mai un” a hun tita a hi. Lalpa lopi ta hen.

A zing a chun, Israelte chule kidona mun lam a chun a chia tau ahi. Ama’u hung do ding ah hungkuan Ammonte leh Moabte chun Seir tanggam ah chengte chu a thagam masiau a do tau ah; chuleh, a thagam zaw kei phat un, amau leh amau a kithattua sau sau ziang tau a hi.

Chutichun, Israelte chu gal do lo kei in Lalpa’n zawna a peta a hi. Ziagualmachun, ei unle Lalpa bel in, ama lunglam hawl in, kingaitawm takin a ma-ang in pauchap leu hi, Lalpa i chungua a lungdam nakleh, i melma ei do piak intin, zawna ei chansak ding a hi.

**Lalpa a chung ua a lungdamlonate chu Ama’u kimuang ma leu zawna a changngai puau hi :**

Joshua 7:2-5 i et leh, Israelte’n Ai khua a dona’u leh a zawlo na’u imu ahi. Jeriko khua khaw lopi tak mai, kulpi sa tak mai ah ki-um chu Lalpa panpina jal in bailam takin a la zo tau a hi. Zia nung a chun khaw neuca Ai khua chu va entha dingin Joshua’n mi a sawl a, enthatute chu a hung tunkit phat un “Mi tawmcha bep a hiziak un mizosia va kisukbuai le ngai pua’na, mi sangni sangthum to va chia ah va lak ziang thei hi’na” ati tau ahi. Chutichun mi sangthum ding vel bep a kuan ua ava do tau a hi. Himaleh, Lalpa a chung ua a lungdam taklo

ziakin a ginchak u kha a bang ta naisai pua; Ai khua mite chun a hun le del ua, Israelte chu kenliang lak in a nawchek ua, sawmthum leh guk hial a that tau a hi. Ei uh le Lalpa i chungua a lungdamlo ahi chun, "Pathian helo nam" tia igen sek teu hin ei nuai chimit ziang thei a hiu ti hia in, Lalpa i chung ua a lungdamlo khak ding hi lau dek dek in, i nisin hinkhua'u hi i mat phat ding uh a kûl a hi.

**Lalpa i chung ua a lungdam theina dingah i bawl ding pawimawte :**

Lalpa i chung ua a lungdam na ding ah i bawl ding pawimaw tamtak um in a, ziate lak a chun pathum bep vak taklang hitiu.

1. Hepina - Johan 15:12 na a chun, "Keima'n ka hun hepi gual ahin, nang mau le kihiepitua chiat un" a tia. I mihing chanpi i u i nau genthei leh liangvaite hepi ding hi Pa Pathian ei dawi dan ahiziakin zia hepina hi i nei zing chun, Lalpa chu i chung ah a lungdam ding a hi.

2. Kingaitawmna - Philippi 2:5-8 i et leh i Lalpa Jesu ngei kingaitawm tak ah a hung umna thu i mu a hi. Zia a kingaitawmna lungthim chu eima'u a le um zing dingin ei dawi a hi. Zia kingaitawmna hinkhua hi i nei phat leh Lalpa chu i chung ah a lungdam sek a hi.

3. Ginumna - II Timothi 2:13 a chun, ei haw gin umlo leu hinle, ama ei haw a ding ah ginum zing a hi dan imu'u a hi. Ama ei haw a dingah a ginum zing gual ah ei uh le ama a ding ah ginum zing dingin ei dawi a hi. Ginumlo thei na ding a tam khawp mai ah, sum leh pai thu a te, I nupa'n kal thu a te, I mawpuakna (I na) a te leh a dang dang ginumlo thei na ding a tam hi. Ziate haw lak a chu ginum tak a i um chun, Lalpa i chung ah a lungdam ding a hi.

Lalpa i chung ah a lungdam theina ding ah I nisin hinkhua mang hawi chiat ding in Lalpa'n I ma'u ei pui zel ta hen.





**UPA PAUKHAWMANG  
(1938-2023)**



Upa Paukhawmang s/o (L) Pu Thangzakhai leh (L) Tingzachin hi 1938 kum in Chongkhozou khuan apiang ah. 26<sup>th</sup> October, 1968 kum in Pastor Pautinlam in Pi Sutkhonem tawh a kikhutsui sak hi. 1960 kum in Education Department nuai in a sem pan ah 2005 in a pension hi.

Upa Paukhawmang hi 1957 kum in Baptisma a chang hi. 28<sup>th</sup> December, 1980 in Rev. P. Kapa Vaiphei in Upa Ordination a chansak hi. Pathian Lalgam nasepna in mawpuakna chuam chuam ala septe chu :

Local Secretary (Hilltown Kochuam) : 1978 - 1989  
Local Chairman : 2005 - 2007  
District Working Committee Member : 1986 - 1992  
Executive Committee Member : 1990 - 1995 & 1997 - 2007  
Bial Chairman : 2013  
Presbytery Treasurer : 2015

July 2023

Kal natna leh natna dang dang ziakin hun sawt tak etkawl ahi nung in phatlam manaw lo in 14<sup>th</sup> April, 2023 zingkal lam dak 6:30 AM vel in ana a seppiak Lalpa kiang zuan in eila mualliam san hi.

**A chate min :**

- |                    |                   |
|--------------------|-------------------|
| 1. Khaikholam      | 2. Pauthiankap    |
| 3. (L) Chindawikim | 4. (L) Tinkhanlal |
| 5. Chawngngainiang | 6. Ngairebek      |
| 7. N. Ngainiang    |                   |

Suapi 3 (pathum) , Minsak - 11 leh Tute - 20 a nei hi.

*Report petu*  
*Upa Th. Chinthang*  
*Secretary (Sr.)*  
*Lamka Pastor Bial*